



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 8

Covid vaccination inyakyim kübok
lanurtem sendoker: Sonia Gandhi

Navalny asünungbo Russia
timtem ajurutsü: France



VOL. XVIII NO. 188 (ADOK 188) DIMAPUR

ROGONÜ (FRIDAY)

RONGCHII (APRIL) 23, 2021

₹ 5.00

Kohima DTF-i COVID inyakyim asadanga



Kohima District Task Force (DTF)-i April 22 nü Kohima jila nung COVID 19 inyakyim asadanga reprangba noksa nung angur.

Dimapur, Rongchii/April 22 (TYO): District nung COVID-19 tashidak prokshia aoba nokdangtsü atema jenjang agitsü asoshi state sorkari tetuyuba agütsür aliba dak ajemdaker Kohima District Task Force (DTF)-i April 22 nü Kohima jila nung COVID 19 inyakyim aser talisa mask asemba yimya shidak benoka inyaker minyaker, aji asadangogo. Kohima District Task Force (DTF) nung District Administration, Police aser Dobashi tem densema lir.

Iba inyakyim ya yimti nung aliba nüburtem nem kümdangshia alitsü atema metetdaksütsü aser mask asemtsü kodang tongtibang iba indang metetdaksüba den COVID-19 wara prokshia aoba nokdangtsü

Dimapur district nung Class 1-8 tenzükdaksütsüla: ANPSA

Dimapur, Rongchii/April 22 (TYO): Dimapur district nung Containment Zone tezülen Class 1 nungi 8 tashi tenzükdaksütsüla aser okshia meshibangi class tem melentepa agidaksütsüla, ta All Nagaland Private Schools' Association (ANPSA) Dimapur Unit ajanga state sorkar nem temepishiba ka agütsüogo.

ANPSA, Dimapur Unit President, Dr. Andrew Ahoto Sema-i Nagaland Chief Secretary dangi shidi ka züluba nung, COVID-19 cases 100 dang tajemba aliba district tem nung akhi ama class agitsü melar ta Education Department ajanga December 28, 2020 nung SOP guidelines tem agütsüba Assam Government-i April 17, 2021 nü sangdongba nung shia lir, ta ashi.

District nung aliba kakete reju ajunga shibangtsü dang nungibo COVID-19 cases talila aliba tesem ya containment zone ka ama iba tesemji shibang tajungba asütsü, ta shidi nung shia lir.

ANPSA tiri ashiba agi, juri kakete reju ajungai yimyatem kanga metsünga-reta amshir aser SOP totuyuba sülen anidaker, anungji ajunga shibangtsü melena class nunga odd aser even number yimya amshitsüla aser class ghonda asem (anepdang 9:00 ako nungi anungdang 12:00 ako tashi) agitsüla.

Nagaland nung mapa agütsüba tsütsü Nagaland sorkar sülenbo juri kakete reju ya dang lir, aser kakete reju shibangba ajanga mapa inyaker zünger mezünga

atema ajak nem SOP sülen anidaksütsü nükjidong nung iba sentong ayongzüka agi.

Linük yimtiba nung tang agi tanabenbuba iba sentong ayongzüka agir, ajisüaka tetuyuba sülen manidaker nisung noklang ana ser lirpezü (242) puogo, aser sorkar tetuyuba dak ajemdaker parnok nem tapet temerenshi agütsüogo.

Iba sentong ya PHQ temeket, main town temeket, Razhü point temeket aser High School junction temeket nung agia liasü.

DTF senden nung lemetetba ama, lokti adenshiba tesem nung COVID-19 inyakyim shidak benoka inyaksü atem tarutsü nunga iba amala sentong ayongzüka agitsü, ta ketdangsurtemi metetdaksü.

takum nung timtem ajurutsü, ta ANPSA ajanga ashi.

Class tem ajunga shibangtsüba ajanga kaketshirtem shisaliok aser angazükba tsütsü tetsükdaksü ajurur. Kaketshirtemi shidakba nung lesson angazükba yimya samar aser ibaji ajanga parnok academic tsütsü aser angazüktsü jangrabangra nunga kongshir, ta ashi.

Akhi yimya nung class agiba anendaksür online class agitsü ashiba ya smartphone malirtem asoshibo kanga tasak lir, aser kechi mimshi kaketshir ajakibo smartphone aser internet service tem mamshitet, talisa kibong ka nungi tanur asem mesüra pezü alirtem asoshi kanga tasak lir, ta ANPSA-i ashi.

Dimapur yimti nung internet service jungaka tesem tezülen aser Dimapur yimti tezülen internet junga mongutetba aser mamshitsüba timtem lir.

Taoba mapang shibangba ajanga tang tashi kakete reju aika nung timtem ajurua lir aser ano kakete reju shibangra, tang shia aliba nung kangasa mejungki kongshitsü aser nisung aika tamajungtiba jenjangi aitsü, ta ashi.

Ajidang masü, arrsanga iba ama tenokdangba magütsüi tentet balala den jelia shila agiteptsüla, ta ANPSA Dimapur ajangasa ashi.

Kakete reju tem kisung nung masü saka department aser lokti tentet ajak nung kasa talenba agütsütsüla, ta parnokisa ashi.

NBSE-i tatidang agishitsüba indang tetuyuba agütsü

Dimapur, Rongchii/April 22 (TYO): Covid-19 ajanga kongshiba kaketshirtem shirnok HSLC aser HSSLC tatidang agishitsüba akümer, item kaketshirtem dak sendakba nung April 5 nü sangdongba den bendeloksema NBSE-i maneni osang kar metetdaksüogo.

1. COVID-19 tashidak potetba ajanga HSLC mesera HSSLC tatidang nung subject kar magütsüetba kaketshirtem tatidang tanaben agishidaksütsü. Kaketshir shirnok COVID-19 tashidak tendangtsü aliba ajanga tatidang magütsüettsüsa aküm, saka COVID-19 Negative report bona lir, item kaketshirtem tatidang agütsütsü melatsü.
2. COVID-19 tashidak poteter aliba kaketshir shirnok tashidak tendangshiba sülen

3. Tatidang agütsütsüba tesem aser anogo mapang tatsü ka lir metetdaksütsü. Item kaketshirtem dang taa kecha magitsü.
4. Item kaketshirtem yagi subject koba agütsütsü ali iba atema Board dangi officially apply asütsüla aser Admit Card photocopy ka agütsütsüla. Kaketshirtemi benokba application ya HSLC/HSSLC 2021 Examination Centre tem indang Centre Superintendent

5. HSLC tatidang atema application tem April 28, 2021 matong tsüngda benoktsüla.
6. HSSLC tatidang atema application tem May 5, 2021 matong tsüngda benoktsüla.
7. Centre Superintendent aser Institutions tekolak ajaki iba osang kaketshirtem nem metetdaksüla.
8. Kaketshirtem HSLC aser HSSLC tatidang 2021 magütsüi metoktsütsü atema iba jenjang ya khen atema agir.
9. Iba tatidang ya sorkari 12.3.2021 nü HSLC & HSSLC Examination 2021 agitsü atema Standard Operating Procedure (SOP) agütsür aliba sülen anidaka agitsü.

Nagaland nung nisung tasen 53 dak COVID-19 putet

Kohima, Rongchii/April 22 (TYO): Bresthibarnü Nagaland nung nisung tasen 53 dak COVID-19 puteta tang tashinung state nung iba tashidak agi menepir ajak senteper nisung 12,800 jungogo.

"Tanü COVID-19 positive cases 53 liasü. Dimapur nung 41, Kohima nung 10, Peren nung 1, Phek nung 1. Ano Kohima nung nisung ana COVID-19 nungi taneptsü nguogo," ta Minister, Health & Family Welfare, S Pangnyu Phom-i Twitter nung ashi.

Item rongnung taneptsü angur 12,116 lir, aser tang active nisung 384 lir, ta paisa ashi.

Taneptsü anguba ya March 19 nü shilem 97.98 liasü aser tang shilem 94.66 nung lir, ta State Nodal Officer for Integrated Disease Surveillance Programme, Dr Nyanthung Kikon ajanga anogoshi COVID-

19 osang sangdongba nung metetdaksü.

State nung iba tashidak agi asür nisung 94 lir, aser item rongnung asür nisung 10 bo COVID-19 den danga tashidak keter liasü. Ajak senteper COVID-19 agi menepir alir nisung 206 danga state temi ogo, ta pai ashi.

Tang state nung COVID-19 agi menepir alirtem rongnung nisung 35 dak iba tashidak agi timtem sümia agütsür, nisung 15 dak timtem terara agütsü aser oxygen inoker lir, aser ka kanga mejungi kangshia oxygen inoker lir aser tanünga nisung 333 dak iba tashidak agi timtem agütsüba mali, ta pai ashi.

Nagaland nung tang tashinung COVID-19 alitsü südi ta temolung melemteti sample 1,42,072 tendangogo aser item rongnung RT-PCR ajanga sample 76,936, TrueNat ajanga

sample 37,862 aser Rapid Antigen Test ajanga sample 27,274 tendangogo, ta Dr Kikon-i ashi.

Kasa mapang Nagaland nung Mongulbarnü tashinung nisung 1,35,043 nem Covishield mozü doses 1,70,259 agütsüogo, ta State Immunization Officer Dr Ritu Thurr-i metetdaksü.

State nung COVID-19 mozü agir alirtem rongnung frontline worker 45,697, healthcare nung inyaker 13,782, teintet rogo 38,436 aser arishi küm 45 dak tema danga tashidak keta alir nisung 37,128 alitsü, ta pai ashi.

Item rongnung frontline worker 22,231, healthcare nung inyaker 9,283, teintet rogo 2,501 aser arishi küm 45 dak tema danga tashidak keter alir 1,201 nem COVID-19 mozü dose tanabuba agüja parnok iba vaccination course tembangogo, ta Dr Thurr-isa ashi.

NPP Nagaland-i Nagaland Angh nem tenüngsang agütsü

Dimapur, Rongchii/April 22 (TYO): Nagaland Angh RN Ravi-i, tang Covid-19 tensa indang sensaksemtsü atema Political Party aser state nung tekolaktem anidenba ajanga pai state atema süokia bilemer ta sayur aser iba atema National People's Party (NPP), Nagaland State-i pa nem tenüngsang agütsür, ta NPP sangdong ka ajanga metetdaksü.

NPP-isa, state nung tekolaktem dang state dak sendakba ken o tem süoki ia agitsü aser Nagaland Angh, shibai state ajunga nung tetuyuba balala magütsü tsüngda sensak asemtsü ayongzüko, pa amala stakeholder balala den ken o angatetteptsü atema ayongzütsü ajungshi.

Maneni NPP-i, Covid-19 wara poktetba sülen timtem tetsükdaksü aika liaka tensa kanga junga azüokteta sorkar maksü nungi kümzüka atema ketdangsurtem, yakbang nung

inyakertem, NGO tem aser pei sasep nung teyari balala agütsürtem nem tenüngsang agütsü.

Ajisüaka wara tanaben poktetshiba mapangbo sorkari taoba mapang tajangshiba nungi agazüka tensa azüoktsü atema renemer alitsü ta NPP-i bilema liasü, ta ashi.

Iba dak sendakba nung züngsemtemi school ajungbena shibangba amala onük benoka sensaksemogo aser lenmang kecha makai akümba mapang nungang state mokdanga ayutsü atemabo jenjang agitsüla ta mulungtepogo, koba Chief Minister-i süoki ia agiogo aser iba ken o ya yakta sorkari anepalutsü ta nangzüko.

Iba ken o dak sendakba nung NPP-i, state ajangzütsü atema maparen takaratiba nung benoka inyaksü mepeshia asungdangogo. NPP Nagaland-isa, nüburtem ajangzütsü aser terenlok atema state ajunga dak

kongshiba ken o tem nung opposition-ia tongti shilem agitsü atema lenirtem dang mepeshia metetdaksü.

Maneni NPP-i, Nagaland sorkar dang paper works nungdang yakbangsüa minyaki terenlok dak sendakba inyakyimtem takaratiba nung benoka inyaksü mepeshia.

Kasa mapang nung NPP tir Dr. Andrew Ahoto Sema-i, sorkar dang road & highway safety measures maliba süoki ia agitsü den mepeshia den diversions, highway safety guidelines, caution tapes, reflectors, barricades, recovery van, ambulances amala ajak kümzüka alitsü asoshi jenjangtem agitsü ayongzüko.

NPP-isa, timla aliba lemsatepba den tensa majungba mapang parnok teyari agütsütsü mulunga aliba lemsatepogo, ajita asünungdang state ajungkettsü atema ajak longjemmer inyaktetsü, ta ashi.

Mokokchung nung Monitoring Support Program agi



DAY-NSRLM ajanga Chuchuyimlang Block Mokokchung nung April 20-21, 2021 anogotem nung State Level Monitoring Support Programme ayongzüka agidang Mission Director den SMMU, DMMU, BMMU Staff aser sentong nung shilem agirtem tangokba noksa ka yangi angur.

Dimapur, Rongchii/April 22 (TYO): Mission Director Imtinenla, Joint Secy. to RD & Mission den Nagaland State Rural Livelihood Mission (NSRLM) nungi M. Rollan Lotha, (COO, NSRLM); Elilo Odyuo, SPM(Finance); Imonenla Imkong Phom, SPM(IBC, M&E); Renvungo Murry, SPM-MIS; Rajuselie Lhousa SPM-FI; Vesuyi Tetsp, SPM-IQAB; Lansothung Yanthan, PM-Finance; Alongba Imchen, Accountant nungertemi April 21, 2021 nü R.D Block Chuchuyimlang Block Mokokchung kübok Mongsenyimti semdanga liasü.

NSRLM ya yimdak yimtsüngtem nung makamaiter temaba jenjangi ajungketba sentong ka linük nung Ministry of Rural Development ajanga tenzüka lir, koba agi makamaiter rongnunga tajemzüktiba jenjang nung

alirtem nem teyari agütsür. NSRLM kübok Monitoring Support ka ama parnoki iba yimtsüng ya semdang, aser state nung tang iba kübok District 11, Blocks 74 aser yimtsüng 1241 awajemtsü nükjidong lir.

Parnoki Block nung VLO's aser Community Resource Persons (CRPs) den sensaksema Mongsenyimti nung aliba Nutritional Garden aser Piggery breeding unit Project tem semdanga liasü.

Iba mapang Moatoshi ADPM DMMU Mokokchung ajanga District nung FY 2020-2021 mapang takok balala anguba indang osang agütsü.

Mission Director Imtinenla, Joint Secy. to RD & Mission ajanga SHGs züngsemtem ajungshi aser state nung NSRLM kübok tetsür SHGs temi takok anguba athishia jembia aser iba mission takok ngua inyaksü asoshi putu

menden, taintem aser nübur ajunga dang amaliteptsü ayongzüka liasü.

District nung iba mission ajanga terenlok aliba aser Mission staff temi mapa meranga inyakba ngua temolung asür, ta Toshimongla Kichu, Project Director DRDA Mokokchung ajanga ashi aser Mission asoshi akokba nung lai yariteptsü ashi.

DMMU Mokokchung ya NSRLM nükjidong tongteta ibyakba nung Piloting District ka ama tenüngsang agüja jembiba mapang, inyakyim ajak kanga junga record bendena ayutsüla, ta M. Rollan Lotha, Chief Operating Officer NSRLM ajanga ashi.

Iba sentong ya District Mission Management Unit (DMMU) Mokokchung aser Block Mission Management Unit (BMMU Chuchuyimlang) nati ayongzüka liasü.

LRD aser KSC na tsüngda tenangzüktepba ka yanglu



Land Resources Department (LRD), Government of Nagaland aser Kohima Science College (KSC) na tsüngda April 21 nü Directorate of Land Resources nung tenangzüktepba agiba sentong nung agiba noksa nung angur.

Dimapur, Rongchii/April 22 (TYO): Land Resources Department (LRD), Government of Nagaland aser Kohima Science College (KSC) na tsüngda April 21 nü Directorate of Land Resources nung tenangzüktepba ka yangluogo.

Tenangzüktepba nung Director, LRD T. Renben Lotha, aser Principal, Kohima Science College Dr. Lily Sema nati sign süa liasü.

Tenangzüktepba kübok:

1. Chemistry Department, KSC-i reagents bendenba aser tzüpokdak tzü jenjang asadanga nung shilem agütsü.
2. Geology Department,

KSC-i achaayanga state kübok district 12 prongla nung jangjar aliba tzüpokdak hydro-geological studies/survey agütsü.

3. State spring inventory 2buba Edition adoktsü. Department-i state spring inventory 1buba bo adokogo.

Tenangzüktepba ya mezüngbo küm ka atema dang asütsü aser nüngdak dang sür ano atsülangshitsü. Iba telongjem ajanga mapa benoka inyaktertem den inyaksü atema academia nem maongka agütsütsü aser iba ajanga parnok nem tajangshiba tajung agütsütsü aser parnok indang bushitsüngdang

maparen nung teyari agütsüba den tarutsü career atema lenmang tali sadema lapoktsütsü.

KSC-i, bushitsüngdang aser kaketshirtem aser State Department tsüngda tesendaktep tajung ka atema tongtibang shilem agütsü aser Lab aser Ali na tsüngda tawa aliba süngdaksütsü.

Kasa mapang nung Land Resources Department-ia KSC den longjemer inyaksü jangraba lemsatepogo aser Kohima Science College nung aliba kaketshirtem densema scientific resources aika aliba maongka agitettsü aser iba ajanga lokti anaprongla kanga ajanzüktsü.

NSCN/GPRN (R)-i 'Tsukhenye' benjung salem lemsatep

Dimapur, Rongchii/April 22 (TYO): NSCN/GPRN (Reformation)-i sangdong ka ajanga Chakhesang nungertem den 'Tsukhenye' benjung salem lemsatepogo.

Tsukhenye benjung ya anogo pezü amunger. Mezüngbuba anogo anepdang yimdak yimtsüyimbu temi antipong ka tenla agütsür aser teburtem anepdang züngia

ayonga kati oa merektetba sentong nung shilem agir.

Iba benjung amungba ajanga Chakhesang nungertem lenla ajak nung maneni tejak dangi aotsü aser asenok tsüngda yimjung aser tesunep adokdaksütsü ta NSCN (R)-i tamang akar ta NSCN/GPRN (Reformation) MIP sangdong ka ajanga metetdaksü.

Dimapur Jio centre office & UCO Bank shibangtsüogo

Dimapur, Rongchii/April 22 (TYO): COVID-19 tashidak menatepa aoba nokdangtsü atema jenjang tapet agütsü asoshi DC Dimapur, Rajesh Soundararajan-i, Jio Centre Office, 1st Floor City Tower Building aser UCO Bank, Chumukedima Branch ghonda 48 shibanga ayutsü atema tetuyuba agütsüogo. Iba

mapang nung ketdangsürtemi tesem anaprongla merektetsü. Paise, tashidak menatepa aoba azüoktsü atema tenokdanga agütsür aliba sülen manidakra Disaster Management Act, 2005, Section 51 nungi 60 aser IPC Section-188 kübok tapet temerenshi agütsütsü, ta metetdaksü.

Osettsüset nung jenjang metemloktsüla: GPRN

Dimapur, Rongchii/April 22 (TYO): Coronavirus tashidak tali akumba tensa aser ano maneni lockdown alitsü südi ta tebilemba nung shishikempadak doka kiburtemi osettsüset nung jenjang temlokba ya kangadang tim masü, ta Government of the People's Republic of Nagalim (GPRN) sangdong ka ajanga ashi.

Shishilempar kari tim masüba nung tajangzük lenmang bushia nüngdakba oset, tatishitsü agi Mustard Oil amala nung jenjang temloka liter

nung sen 150 agi ayokba osangtem lir, koba yimya agi sen 100 agi ayoker. Daal amala danga osettem nunga jenjang temlokba osangtem lir, ta sangdong ajanga ashi.

Shishilempadak asaa nüngdakba osettem agi anünga kumdaktsüba memelatsü, aser tashidak wara agi timtem agütsüba mapang nüburtem nem khuret agüja dokan kibur temi nüngdakba osettem rizünga/mima mayutsüla, ta GPRN sangdong ajangasa ashi.

Mon, Covid-19 District Task Force senden amen



Dimapur, Rongchii/April 22 (TYO): Covid-19 District Task Force, Mon aser Mon Covid-19 Vaccination, District Task Force na senden ka April 21 nü Deputy Commissioner office Conference Hall nung menogo. Iba senden ya DC Mon, Thavaseelan K IAS lenisüba nung agia liasü.

Senden nung DIO Mon, Shashinle Tep-i, Mon nung vaccine agütsüba mezüngbuba aser tanabuba shilem nung nisung 15,207 nem vaccine agütsüogo, ta metetdaksü. Laisa, arishi küm 18 aser tempur nem May 1, 2021 nü nungi vaccine agütsütsü merangtsü ta ashi. Maneni lai board dang full capacity nung

vaccine agütsüba session tajemba agütsü atema sentong yanglutsü mepeshi metetdaksü.

State nung Covid-19 tashidak tanaben poktetshiba dak sendakba nung police tem ajak vaccine agütsü aser Anganwadi aser ASHA worker tem front line worker tem ama züngoksemsü atema senden nung sensaksema liasü.

Kasa mapang nung Mon DC-i, Mon District kübok jilatem nung aonung 7 ako nungi anepdang 5 ako tashi nisung pezü dak tema adenshitsu memelaba metetdaksüogo.

Tetuyuba sülen manidaketem nem tapet temerenshi agütsütsü, ta kasa sangdong ajanga metetdaksü.

Longleng district-i arurtem nem tetuyuba agütsü

Dimapur, Rongchii/April 22 (TYO): April 15 nü tetuyuba agütsür aliba den bendenloksema, tanga state nungi Longleng district-i meyipa arurtem anepalutsü asoshi district kübok aliba yimtsüng aser Wards ketdangsürtem nem tetuyuba tasen kar agütsüogo. Tetuyuba nung district-i maru

tsüngda anogo asem jelia Covid-19 tashidak tendanga negative report sayuteterem quarantine mesüdaktsütsü. District-i meyipa arurtemi negative test report indang soft/hard copy bener alitsüla aser ketdangsürtemi ashishiba mapang sayutsü nüngdaker, ta shia lir.



Guwahati, April 22: COVID-19 tensa dak sendakba nung Bresthibarnü Guwahati nung Assam CM Sarbananda Sonowal lenisüba nung all-party senden ka menogo. Assam nung political party balala nungi lenirtem den senden amenba mapang Sonowal-i state nung COVID-19 dak sendakba ken o balala benoka sensaksema liasü.

Silchar airport tonga arur passengers 300 shi covid metendangi jena ao

Guwahati, Rongchii/April 22 (Agencies): Assam kübok Silchar airport tong arur passenger 300 shi, Covid-19 tashidak tendangba paitsüoktsü atema airport nungi jena aoba metetdaksüogo.

Cachar district ADC Sumit Sattawan-i, parnoki tayimtsü nung senzüba passenger tem ajak indang osang tejangja bendendar aser parnok anema temzüng ozüng kübok jenjang tapet agitsü, ta ashi.

"Indian Penal Code (disobedience to order), section 188 kübok jena aoba passenger tem anema jenjang tapet agitsü,"

ta Sattawan-i Bresthibarnü Silchar nung osangbenertem dang ashi.

Cachar district administration-i iba ken o bushitsüngdang tenzükogo.

Airport aser health department source tem ajanga ashiba agi, Bodhbarnü passenger 690 tayimtsü trok nung Silchar airport tonga aru, saka passenger 189 dang covid tendang aser parnok rongnung nisung pezü dakbo tashidak potetogo.

"Airport record ajanga nisung 300 shi tashidak metendangi jena oadok. Ajisüaka nisung ajak bushitetsü, kechiyong parnok

tayimtsüi atuba aser aluba mapang parnok indang identity card tem sayur," ta airport ketdangsür kati ashi.

Health department-i tayimtsü nung senzürtem tashidak tendangtsü atema airport anasa aliba mozüki ka nung Covid tendangtsü renema lir, saka passenger 300 dak tera tali tashidak metendangi jena ao.

Assam sorkari Bodhbarnü SOP tera melenshija tayimtsü aser train nung Assam-i arurtem Covid tendangba result negative bener aruaka anogo tenet quarantine asütsü asoshi tetuyuba agütsüogo.

Arunachal Govt ketdangsür tejen ka apu

Itanagar, Rongchii/April 22 (Agencies): Murkongselek (Assam's Jonai) nungi East Siang district nung Pasighat tesem tashi Northeast Frontier Railway (NFR) broad gauge railway project atema ali taa lemshiba dak sendakba nung ochi mashi inyakyim aliba potetba sülen Arunachal Pradesh Police's Special Investigation Cell (SIC)-i, State sorkar kübok APCS officer tejen ka puogo.

SP (SIC) Hemant Tiwari-i, ken o bushitsüngdangba mapang aija alisang Tamiyo Tatak, shiba tang Joint Secretary (Research), Government of Arunachal Pradesh lir, pa yashi nikongtsütsü Pasighat nung puogo, ta ashi.

"Murkongselek nungi Pasighat tashi 'Ruksin-Pasighat' segment, broad gauge railway line yangluba dak sendakba nung ali alizükba inyakyim ajak nung aibelen aliba dak iba ken o sendaka lir," ta SP-i ashi.

Paisa, ali taa lemshiba mapang 2017 küm Tatak ya

East Siang district indang Deputy Commissioner liasü, ta ashiba den ken o maneni bushitsüngdangdar, ta metetdaksü.

Temetetsükaji Chief Minister Pema Khandu-i taoba ita State Assembly nung NFR project mezüngbuba shilem nung railway line yanglutsü atema benoka aliba km tenet kija atema sen crore 73 shi agüjatokogo, kong admin charges densema lir ta ashi.

Khandu-isa, pai file tem reprangdangogo aser inyakyim meshidak aliba reprangtetogo, ta ashi. "Ni file nung inyakyim meshidak aliba reprangtetogo; langka atema temelaba agütsü aser tanga ka atema telemtetba agi," ta pai ashi.

Chief minister-i ken o tetuteta sayuba sülen Indian Penal Code (IPC) sections 120B, 409, 468 aser 471 den PC (Prevention of Corruption) Act, 1988, Sec 13(1)(c)(d) aser 13(2) dak ajemdaker PS Itanagar nung March 15 nü ken o ka benoka liasü.

NLFB lenir ka Meghalaya nung apu



Shillong, Rongchii/April 22 (Agencies): Meghalaya police-i Bodhbarnü tawa tentetba National Liberation Front of Bodoland (NLFB) indang tongtibang lenir ka West Jaintia Hills district nung puogo. Iba telok ya Assam nung amendaker lir.

Jaintia Hills district nung NLFB telungpurtem senzüsenpongba indang osang tejangja ka angazükba sülen Meghalaya police-i, West Jaintia Hills district kübok Amlarem tesem nung Jotish Daimary (42) apu.

Police temi pa ket nungi smart phone asem aser keypad phone asem ngutetogo. Iba den Assam nung züngoksema aliba gari ka aser tashishitsü aketba kuli kakettertem pa ket nungi nguteta liasü.

Daimary ya 2020 küm January ita bendanga agütsür aliba National Democratic Front of Bodoland (NDFB) züngsem ka liasü. Centre-i NDFB telok pezü aser All Bodo Students' Union (ABSU) den Bodoland Territorial Region (BTR) pact

nung sign asüba sülen NDFB-i bendanga agütsü.

Pa NDFB nung 2009 küm aden aser Meghalaya, South West Garo Hills district kübok Mahendranj tesem ajanga orr Bangladesh nung hadir balala amshitsü angazüka liasü.

"Pa senzüsenpongba aser Meghalaya nung pa den sendaktepa alirtem jangjatsü atema onoki pa dang ken o ashishidar," ta police ketdangsür kati ashiba den Daimary ya nisung pur aoba, nisung tepsetba aser ozüng alema inyakba maparen balala nung shilem agiba atema ken o aika nung aija state kübok East, West Jaintia Hills aser Ri-Bhoi district nung aputsü bushia liasü.

Kasa mapang nung Daimary ya pa anema ken o benoka aliba dak sendakba nung Ri-Bhoi police nem bendanga agütsüogo, ta police ketdangsürisa ashi.

NLFB lenir ya hadir balala alizüktsü atema tenangzüktepa yanglutsü asoshi international artsüi oya aliba mapang apu, ta police ketdangsür tejen kati ashi.

Assam: Congress candidates 40 shi Dichang Resort-i anir ogo



Guwahati, Rongchii/April 22 (Agencies): Assam Assembly election results sangdongtsü anogo 10 majung aliba mapang Assam nung resort politics tali benoka inyaksangshidar.

Assam Congress-i parnok indang candidate 40 shi Guwahati anasa Sonapur nung aliba Dichang Resort-i anirogo.

Dichang Resort-i anir aoer rongnung Rupjyoti Kurmi, Wajed Ali Choudhuri aser Siddique Ahmed nunger densema lir.

Congress lenir tejen Debabrata Saikia-a Bresthibarnü anüngdang Dichang Resort tonga aruogo, ta source kati metetdaksü.

Ajisüaka Debabrata Saikia-

i, Congress lenirtem resort nung telongjem sentong ka agitsü atema adenshiba dang ta ashi.

Assam Congress tir Ripun Bora, Bodhbarnü nokongtsütsü Dichang Resort-i aru aser candidate tem anidenba maparen ajak pai achaayangdar.

Congress candidate tem ajak resort yagi gate number 4 ajanga idar.

Assam Assembly elections result May 2 nü sangdongtsü lateta lir.

May ana nü Assembly election vote azüngba sülen candidate tem tanga party-i atsür aotsü akok ta tsüba bilemba ajanga Congress candidate tem ajak Dichang resort nung anidendar.

Kasa mapang nung 'Mahajot' nung dena aliba party; Bodoland People's Front (BPF)-ia parnok indang candidate tem tanga linük kati anirogo, ta osang ajanga metetdaksü. BJP-i parnok candidate tem atsür aotsü akok ta tsüba bilemba ajanga parnoki iba jenjang agi.

Guwahati nung media sangdong balala ajanga ashiba agi, BPF candidate tem den Bodoland Territorial Council (BTC) züngsem 16, Bhutan mesera Singapore-i or alitsü.

Assam assembly nung menden 126 atema election shilem asem küma lemsar March 27, April 1 aser April 6 nü agiogo. Election result May 2 nü sangdongtsü.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 23, 2021

Alima tetsü anogo

April 22 ya alima tetsü anogo (International Mother Earth Day) liasü. Alima nung asenok alir aser alimaian asenok mesür, iba jagi alima (earth) dang ya oja ta ajar. Aji oda, alima ajunga nung ojalatem anogo (mothers' day) amongtsü hopta asem lia alima nema oja ta jalokja "Alima Tetsü Anogo" amongtsüba ya kanga tapet aser tongtibang sentong ka lir. Aji oda, United Nations ajanga alima nung tongtibang onük aser mapatem reprangteta, iba onük shia anogomong kaka amongtsü latetba nükjiongji alima nung alir nübortem nem tangatetba agütsüner, kechiyong koba onük aser mapa nung südir sang, nübortemi angatetterbo ojang, melamelaa mapa akümtsü. Ajisüaka, UN-i anir alima anogomong amongtsü UN-i shimteta toktsüba ya alima kintemi kangabo züngzünga mamonger amai repranger. Iba jagi alima tetsü anogo ya nisungtemi memetetika dang süidaktsüogo. Ashi, telok tulu ayongzüka sentong tulu magiyonga tesem tesem nung government-i anir lokti tentetemi alima anogo sentong ayongzüka alima meimtsüba onüktem benoka jembi nungbo, iba jagi alima tzü mopong kümzüka ayutsüba mapatem nung kanga yarila. Asenok alitsüba tesem yabo ka dang lir, aji alima (earth planet), anungji alima nung ya asenok tali majung kümra, tejenokdak maka, reprangtepa asütsüba dak alaka tangalen nungi teyari angudak makatsü. Aji ta ka masü asü nungbo, tang ama alima nung Covid tashidak wara tamajung agi amokmerendang asenok maoyonga, tangar tashitemeteter aser takar lima nung sensosangertembo ajak iba lima toktsür tanga lima (planet) tesadem aser tajungba ka bushia orr lila. Iba jagi asenok nem tangatetba ka agütsüba, asenok ajak taküm junga alitsüba talidak tesem, chiyongtsü aser tzü mopong agütsüba tetsü (ojala) ka dang lir, aji alima, anungji asenoki la ya kanga meimtsüla aser anepalutsüla. Asenoki alima meima anepalubaji asenoksasa asenok anepalur asütsü. Atangji, alima nung aliba süngdonglidong aser shiruru ajak ya asenok nungdak nung agitsü asoshi Tsüngremi yanglua toktsüba rongsentem lir, anungji asen nungdak nung süngdonglidong lensüka agitsüla aser asen temang shi nungdak asoshi shirurudem tepseta achitsüla. Ajisüaka, alima nung nisungtemi pei nungdak yari agir masü saka pei aginütsü aser pei chijemnüba apia agir aser achir, iba jagi alima raksar aser tzü mopong meshitak kümdaktsür. Ashi, Tsüngremibo asenok ajak nungdak peria alima nung yuja lir. Asenok nungdak atema süngdong kati peritsüba ser nung asenoki arem agi moapu küma süngdonglidong ajak lensüka agir aser item melena süngdong tasen tema meyutsür. Aji oda, chi anangtsü atema ango ka anati peritsüba ser nung mesüra ozü aser shiruru ka agi peritsüba ser nung, asenoki ayong nung taliba temang asütsüba inyaker aser arem nunga shiruru ajak samatsüba asenok nungdak dang nungi alia arem shiruru kata mali samatsütsü meranger amato inyaker. Asenok Naga nungeribo alushijak tashi arishia air gun agi akhar aser tachia machi odang toktsür, kechiyong alushijak shibo machir ta jembir. Aji oda, Nagaland arrtsü adena Assam leni odangra nisung aliba tesem ajaklen waro aser posü ozü agi sünga angutsü, ajisüaka Nagaland-i arutsübo waroia tsübur. Iba jagi asen lima nung asenoki meteta aser memeteti timtem adoktsü, kechiyong asen lima nung waroi achiba mesen adoktsüa akok saka tachir malitsü. Iba amaji alima nung nisungtem tipdema alitsü asoshi Tsüngremi shirurudem ya yangluja lir. Ano, asenoki alima meima inyaktsubaji, akok tashi plastic mamshii, asenoki amshir endok nung ali küma aotsüba osettem amshitsüla. Asenoki amshir endokba plastic ajunga ya meiloni ali aser tzü telong nung remadoker. Aji oda, ali telong nung plastic ali nungji, ibaji ateta tema nungi tzü mair aser telong nungi süngdonglidonga mekuteta madoktetter. Tzüim aser ayong telong nung plastic arangokba ajanga ali o tzü na tsüngda tesendaktep melii plastic agi nembangadoker. Iba jagi tzü nung aliba taküm shiruru aika taküma meliteti samar aser ano aika samatsüba anünga lir. Alima nung ya asenok dang lir atemtsüba masü saka asenok chirnur aser parnok chirnur aser semchirsemnurtem lia aotsü, anungji asenoki asen meyong lima ama mebilemi, parnok meyong lima nung khen arua amonger ama bilema, parnok alima nung ya tzü mopong tajung agia jangratema lidaktsütsü bilema inyaktsubaji junger.

OLEMSABANG

Tanü putu den apet kulisüba

~ Mr. Imkümmeren (Otongdar)

Mebendangtetba putu

India lima nung otsü ka yanglubaji, September 6, 2018 kechiyong iba anogo nung, Supreme Court ajanga obendang angütsüba-ji külem tetsür-i tetsür den aser tebur-i tebur den medemtsü akok ta temelaba angütsüba anogo ka liasü. Iba anogo aika asoshi tammang tia-i aiba anogo liasü saka aika asoshi tesalaba aser nüchi anogo ta züngshiba angur. Item yimya benshiba jenti asen lima nung lir. Ya shitak tai asüba O-ji balaka saka iba putu nung yamai alidang asenoki Tsüngrem Osang tajung koda kuli asür?

Tokolok health timtemba putu

National Alliance for the mentally III (NAMI)-i ashiba agi kodang nisung ka tokolok shirangdir indang indanga mebilemi teraksa agüja tangar nem timtemdaksür, jaklaliro (mood) yakta dang rasaa aitba aser jakla aйдang pei temang mesüra tangar kecha mapayu-i timtemdaksür, meteta aitba (feelings) kecha malibaji lir. Adangji World Health Organisation-i (2016) ashiba agi tokolok timtem alima nung timba aketbaji, depression aser iba ajanga India nung nisung asem nung anabo iba shirang aliba lir. Iba shirang ajanga, nisungji teti jashia dang alir, pei teti inyakba mapa meinyaknüseta akümba, mejangba aser chia ajem junga masüba, temulung magütsütetba, teimla makaba, pei sasa aibelena ta jashia pei taküm agibatemi lir. Tanü tensa nung aika ajungbena pei sasa taküm aginübatemi lir. Pei arishi anogo mapayu-i yimya balala ajanga tepsetba angur ano yamaji nisung karbo oda junga dang külemi kinunger aser medemertem külemi dang lir külen ajungbena la/pa kisung dang alitsü merangba, amatari buluba, yimya balaka aliba, O mashi-mashi dang pa/la kechi jebir memetetba, kanga tsübuba aser yamaji tashitak yimya balala lir. Anungji kodang tokolok health junga meidir, item timtem alitsü. Tanü putu iba timtem ya lir. Shibai metet ne dak mesüra na anasa aliba kiyongerji timtema alitsü ako. Tanü iba putu nung tamangertem-i koma kuli asütsü?

Teraksa jenti adokba putu:

Naga lima nung teraksa jenti lir ta asüba ya kibong, lokti, Arogo, School aser College-tem balala nung jembiba lir saka temelenshi aser teinyakbatem kanga tang ishika lir. Tanü ajaki Government mapa nung dang aginür, subsidy dang bushiteper, Bank nung loan angati temoatsü angu ama agiteper, back door appointment sarasadema bushiteper, side income onsara, pei ki tulu marble agi yangbanga ayu, Gari jenjang tasaktiba alia ayu saka lenmangbo ayatai, election arura anüng nungi temoatsü tsükba ama pei temeden aser development yoktokba angur. Tanü tamangba lokti nung telemsa, development, politics, tatok magütsütetba, tila mekümtetba, pei tanela-tamang jenjang tuluba ta asüba asüküm aser yamaji külem kidanger- kiyonger den tesendaktep melii amangbapur jenti adokkogo. Teraksa indang jembiba ya joko laakja laakadokkogo saka ya meteta iba tensa nung alidang shibai kuli asütsü?

Ajak shitak ta asüba putu:

Tanü putu nung shitakba aser ya dang ochi ta asütsüba ya kanga dang tasak kümadokkogo. Temetetba (knowledge) ya nisung ajanga yanglur aser purateter ta asüba tangatetba lir, anungji na asoshi temetetbaji shitak süra nai tangar dang naji dang shitak aser tangar agi metebaji ta meshitet. Iba tamendakba nung tanü alima yangera odagi, tanü tamangba yimsü ajak shitak dang aser ajak dak amangbayong anisüngzük lima atongtsü ta asüba tesayuba lir, tanü joko kija, kibong aser lokti nung libaliro tajung (Morality) ta asüba ya tsükogo ibayongji kibong asüngteta melitetba khuret, lanuputu rongnung kibong aküm maküm kija melii, puteper aser meputep ta asüba nung külemi litepa, Ochi jembitsü masü saka lokti tuluba mulung nung alitsü aser aotsü ta asüba. Tanü tebilemstü tulu lir. Süra Ochiji kechi aser shiba? tanü putu ya lir, süra nai koda kuli süla?

Putu den apet kulisüba:

Tamelen asenoki iba putu tensa nung tebilemstü indang jembia aruogo aser tasüngdangbatem nguogo. Shibai inyaktsuba? Shibai jembitsüla? Kechi inyaktsuba? Anungji iba tasüngdangba asoshi telangzüba kaji Kulisüba ya lir. Iba putu den apet kuli asütsü asoshi mapa kar yamai lemsateper.

* Tatishitsü tajung (askesis) ayubaji kulisüba:

Asenok meimchir yimya kaji, kodang nisung ka südir iba anogoji la/pa asoshi kuli agütsüba anogoji lir, aser iba kuli nungji kar asoshi tatishitsü tajung kar asohi tamajung aliba jembir. Saka Yisu Khrista-i aginüba takümji, tatishitsü tajung aliba taküm kuli, saka iba kulisüba mapa ya Yisu ama aliba yong tang inyaktet. (Matt.5 :14-16). Asen taküm ya pei-i repranga alir aser pei den liyonga aor saka tamangertem aiben temeyoktep nung Yisu ama melitetba tatishitsü yutsüba yong tanü iba putu teraksa jenjang nung lir. Iba putu asosho Yisu ama tatishitsü tajung aliba kulisüba nungdaker. Süra na koma kuli asür?

* Mapatem ajanga Kulisüba (diakonia):

Yakob 2:20 nung ashir "...Tamang mapa meteni tapung..." tanüptut nung tamangertem asoshi teraksa jenti adokdang, digital aser internet putu, ajak shitak ta asüba putu, lipo-küm timtembaputu nung mapa ajanga kulisütsü kanga tasak kümogo. Tanü tebang kisung (lip service) tang timba angur kecha tamangji ano mapa küma mao. Tanü amanger saka, Tsüngrem den sensaksem mali kechiyong mobile technology ang tajungba. Amanger saka süngdong, ozü sangnu ajak temoatsü ta züngshia kasetta chimar, amanger saka Yisu ama aria bilema ochi nungpei kiyonger den meliteter, amanger saka tax agi asüngba, amanger saka pei azükaro nüchiso temeten kisung bushiba. Tanü tamanger masü saka, mapa agi kuliser nungdaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

USCIRF-i International Religious Freedom 2021 report sayaogo

Washington D.C, April 22 (Agencies): Brihostibarnü (April 22) United States Commission on International Religious Freedom (USCIRF)-i 2021 kum indang International Religious Freedom sayaogo; USCIRF-i US State Department dang Nigeria, India, China aser Iran densema linük 14 Country of Particular Concern (CPC) nung züngoktsü atema benokogo.

USCIRF ya 1998 kum International Religious Freedom Act-i tentetba bipartisan commission ka lir aser parnoki alima nung religious freedom anema inyakba linüktem CPC nung züngoktsü atema State Department dang benoka arur.

Yaküm USCIRF-i benokba nung ajemdaker State Department-i Nigeria linük-a CPC linüktem rongnung züngoka liasü.

USCIRF report ajanga ashiba agi, "Yaküm Nigeria nung tamangba yimsü temeden anema inyakba jenjang tamajungba aküm."

Taküm-a UNCIRF-i maneni Pakistan linük CPC nung züngoktsü atema benokogo; Pakistan nung Tsüngrem mezüngmeshiba ozüngtem nung ajemdaker Khristantem anema inyakba

tatalokba aika aliba agi iba linük CP nung züngoktsü atema benok.

Ano külen taküm agi kum anabuba USCIRF-i India linük-a CPC nung züngoktsü atema benokogo. 2020 kum nunga India CPC nung züngoktsü atema benoka liasü ajisüaka State Department-i magizük.

2021 kum report nung USCIRF-i linük 12 State Department indang Special Watch List (SWL) nung züngoktsü benok, aser item linük rongnung Azerbaijan aser Turkey densema lir.

Kasa report nungsa Nagorno-Karabakh region nung Armenia nung Khristantem indang tekülem kitem aser tamangba yimsü dak sendakba tesemtem kumzüktsü atema mepishia lir.

USCIRF report pelaa agizüka International Christian Concern (ICC) Director of Advocacy, Matias Perttula-i, "CPC-i ano maneni India linük CPC nung züngoktsü atema benokba asoshi onoki pelar. Iba linük nung nütsüng ajema aliba tamangba yimsütem reshikangshiba jenjang tamajungba kumogo. USCIRF-i State Department nem iba report agütsüba atema pelar, aser maneni alima nung tamangba yimsü balala sadoka amangtetsü atema inyakba

maparen nung US sorkar den onoki yariteptsü melunga lir," ta metetdaksü.

Tawa meimchir temeden atema inyakerkem den lokti tentet aikati shidi ajanga USCIRF dang India ya CPC nung züngoktsüla ta mepishia liasü.

2020 kum report nunga USCIRF-i state department dang India ya CPC nung züngoktsü atema benoka liasü saka magizük. Meimchir temeden atema inyakerkem aser lokti tentetemi, India nung nütsüng ajema aliba tamangba yimsütem anema inyaker, aser yaküm dang nungibo taküm tamajungba, ta shidi ajanga metetdakja liasü.

2014 kum India nung Khristantem anema inyakba tatalokba ken o 147 liasü saka 2019 kum nungbo Khristantem anema inyakba tatalokba 328 tashi liasü.

ICC Director of Advocacy, Matias Perttula-i, "Taküm-a USCIRF-i kasa onük benoktsü (CPC nung India züngsemsü) ta onoki imlar, iba dak alia Joe Biden administration-i alima tesem ajaklen religious freedom atema inyaksü aser India ya CPC linük, ta sangdongtsü imlar. US leniba nung alima tesem ajaklen aser mapang ajak nung religious freedom atema inyaksüla," ta ashi.

ANO GO ABEN TSÜNGREM DEN

Inyaktetbaji tajangzük

"Aser Kiburi pa dang ashi, 'Lanlia, kilir tajung, kechiaser na tila ka nung temulung lemteta lia aruogo, na yimti ter madak tashi akatsü".

Lk.19:17

Tanü asenok kibong aika nung kidang pi nisung teyariteper (kilir) yua lir. Kibong aika nung kiburi kilir ta asüba tangatetba nung benlepa amshiba angazüker, saka kibong kar nungbo chirnur ama amshiba ngua arudagi. Khen mapang adianu kibong ka nung sensaksema kazüba mapang kibutsüla jagi yamai lemsatep, "ozü kibongbo tenüla (teyariteper) ya malinungbo kibong ajunga tazüngla akümtsü, onok asoshi la teti anema lidakjang ta sarasademi' ta ashidang nia temoatsü kanga angu. Laishiba nung Yisu-i aibendang O intepba agi yimya balala amlepa jembiba angur. Luke 19:11-27 nung ki kibur kati pei kilirtem ter nem sen kaka agütsür iba jagi pa asoshi shilepa atatsü shir ain talangkati ao. Kodang yimlijag agizüker pa kidangi meyipa shilang, pai ashiba ama pai kilirtem kaa parnoki shishiba nungi tajangzük anguba indang asüngdang; idangji mezüngbubai ter aser tanabubai pungo ajangzükba bener arua agütsü saka tasembubai kiburi agütsüba nungi tajangzük makai meyipa bener arutsü. Amangbapurtem, Yisu Khrista tanaben aruba mapang nai aser ni inyaktetba kuli asüngdangdang Pai asen dang 'Lanlia, kilir tajung ta shitetsüsa Pa asoshi meranga inyaka atadi arung.

Sarasadem

Kibuba Yisu, Nai kü dang 'Lanlia kilir tajung' ta shitetsüsa ni mapang ajak taküm aser mapa ajanga kuli südi. Amen

Indonesia nung police-i pastor Rev. Paniel Kogoya apu



Paniel Kogoya (tachichi) perangpong amer aliba noksa nung angur.

April 22, 2021: Indonesia nung police-i Papua nung Protestant pastor kati separatist telungpurtem nem raraba hadir agütsür, ta tai tonglokja apu.

Nabire district kübok Kali Bobo yimdak aliba Advent Arogo nung pastor Reverend, Paniel Kogoya-i Free Papua Movement telok nem raraba hadir agütsür, ta tai tonglokja pa apu, ta Nemangkawi Task Force nung otongdar, M. Iqbal Alqudusi-i metetdaksü.

Seperatists telungpurtem den raratsü atema 2019 kum Indonesian National Police-i Nemangkawi Task Force ya

tenteta liasü.

Melung melemi pua aliba nisung anati osang agütsüba nung ajemdaker April 18 nü pastor, Paniel apu. Asüngdangyaba mapang nung nisung ana jagi pastor-i tena dang raraba hadir ayok, ta nangzük liasü, ta April 21 nü Alqudusi-i Jakarta nung osangbenertem nem metetdaksü.

Paisa, pastor Kogoya tang Nabire district police jail nung lir, aser pa dang maneni asüngdangyadar, ta metetdaksü.

Alqudusi-i ashiba agi,

security sepaitem aser civilian amaksü atema Kogoya-i 2018 kum nungi tenzüka telungpurtem nem raraba hadir agütsür, aser tawa-a pai Intan Jaya district nung telungpurtem nem M4 aser M16 prangpong aika agüja liasü.

Papua police chief Inspector-General Mathius D. Fakhiri-i, Kogoya-i Arogo dangi aruba tenla aser business ajanga ajangzüktemba sen agi prangpong alizüker, ta ashi.

Indonesia nung telungpurtem dang raraba hadir ayokba ken o nung tawa sepai aser police aika apuba sülen tang pastor apur.

Telungpurtem nem raraba hadir agütsüba ken o nung April 18 nü Intan Jaya nunga police ka pua liasü. Tesüiba kum aika Indonesia nung nüchiso meshia Papua nung timtem kanga adoka arur.

Tawa Puncak district nunga tesayur ana aser kaketshir ka densema civilian pezü tepset aser school ana rongdokja liasü.

Papua Justice & Human Integrity Foundation nung executive director, Theo Hesegem-i, tiyazü nung tai tongokja arurtembo onoki pusemsü ajisüaka pastor Kogoya-ibo aibelena lir ama reprangteter, ta metetdakja liasü.

Sen million 1.5 ochimashi ken o nung Pastor ka anema ken o benok

April 22, 2021: Washington D.C nung pastor kati ochimashi ajanga Paycheck Protection Program (PPP) funds nungi sen million 1.5 loan agia gari 39 aliba den pa atema osettsüset balala alidenba asoshi pa anema ken o benokogo.

Pastor Rudolph Brooks Jr. ya Washington D.C nung aliba Kingdom Tabernacle of Restoration Ministries nung pastor lir; ochimashi ken o nung tan ita tetenzüklen pa apuba sülen iba ken o nung aitsüra pa kum 20 tashi tepuokdak ayutsü.

Department of Justice osang ajanga ashiba agi, federal ketdangsertemi Pastor Brooks-i bank account balala nung rizüngba sen million 2.2 puogo.

Brooks-isa ochimashi ajanga PPP loans agia 2017 Mercedes-Benz S Class, 2017 Infinity Q50s ana, 2015 Cadillac Escalade ka, 2005 Bentley Continental ka aser 2014 GMC Yukon XL gari densema gari 39 tashi alia liasü.

Pastor Brooks ya Cars Direct, Gavawn HWD Bob's Motors kibur lir aser 2020 kum May ita nung pai business atema PPP loan sen 1,556,589 agia liasü.

Yaküm May 9, 2020 nü Brooks nem PPP loan sen 1,556,589 agütsü, iba sülen pai senji bank account ka nung inoka liasü. Pastor-isa Cars Direct tenüng nung bank account aika lapoka senji rizünga liasü.

Brook'er Arogo website nungbo, "Pa ya Tsüngrem melung bushiba nisung ka aser Tsüngrem chirtem tenzüktsü jangraba nisung ka lir," ta shia lir.

2018 kum The Impact nungi Robin Dorsey-i WBGR indang interview ka agiba mapang nung pastor Brooks-i, "Ni arrshi kum 4-5 asüandang nungi kü taküm nung Tsüngremi ni jatetba ni jangjaa liasü," ta metetdakja liasü.

Paisa, pa tebu-a pastor liasü aser pa Arogo nung intet, ta lemsatepa liasü.

OLONG PAITEP # 5790

1		2		3		4	5			
				6						7
		8								
9				10		11				
			12					13		
						14				
16						17				

- | | | | |
|----------------------------|-------|--------------------------------|-------|
| TIPILEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S _ _ _ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzüma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 5789 TELANGZÜBA

- | | |
|---|--|
| TIPILEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |



PASTORBAI ALOKBA COUNSELLING AGIR :

Pastorba : Anükla Alok, ya joko Yisu tanaben arutsü mapang tongogo, taji naa yamai dang züzüa melii telemtetba ka agitsüla. Yamai amanga arur molumii ora koda? Kodaki atutsü atema joko asen taküm renemshia alitsüla. Nai koda pilemer.

Alokba : Haeet, oko aji meshitetajia lidikor saka tangsa tang kodaki atutsüjibo tepilemtsüa.

Pastorba : Waa, anük koma aji?

Alokba : Ni temokok ya onsaraa ayangerji kodaki atutsüji asakja.

Pastorba : Oh Alokba

Lilir : WhatsApp

TANÜBO NAI LANGZÜANG

Q. Paytm indang headquarter kong lir?

A. Mumbai B. Noida

C. Kolkata D. Bangalore


_____ (Taruba adok nung onoki langzüksü)

YASHI ADOK TELANGZÜBA : Babar Azam

AO OSHI ANGAZÜKDAK:
TANÜ ANGAZÜKTSÜBA OJANG

Chi
(n) taküm alitsü atema chiyongba tongtibangtiba chiyongtsü (rice)
* Na **chi** chiyonger mechiyong ?

Chi
(n) tsük abenba khu (traditional tall carry basket particularly for paddy)
* Akhidangbo **chi** nung tsük sünga enoker tokolak nung aben.



NAI-A YA METETTER MA?



Joseph Grisamore

Minnesota kübok Park Rapids tesem nungi Joseph Grisamore-i 'Mohican Mohawk' talangtiba awaba atema Guinness World record yangluogo. Joseph indang mohawk tasazük inch 42.5 alitsü. 2007 küm Joseph-i iba record yanglutsü mezüng merangdang. Ajisüaka, küm 13 sülen ang Joseph-i iba alizüng tongtet.

SUDOKU # 5833 TELANGZÜBA # 5832

	8				7	9	3	9	5	7	4	1	2	8	3	6	
	1		9	8	5			6	4	3	8	5	7	1	9	2	
	6			7			1	8	2	1	9	6	3	7	4	5	
	4		7	2		3	6	3	8	2	6	7	4	5	1	9	
3	5		8			1	7	1	9	5	3	2	8	4	6	7	
		7	3		1		8	7	6	4	1	9	5	3	2	8	
1			4	6	7	8		9	2	3	9	7	8	1	6	5	4
5	9			3			2	5	1	8	2	4	6	9	7	3	
	7		5			6	3	1	4	7	6	5	3	9	2	8	1

OJANG LUTEP # 5376

- KTLOI :
- UNNG :
- LEMKÜI :
- ÜNZÜMESI :
- EPI :
- ULUNGMKA :
- NGNU :
- SEDANNZÜG :
- TEMTIM :
- UANG :

OJANG LUTEP TELANGZÜBA # 5375

TEBANG AGI RASAA MESHITET MANGUR DENBO KOMAANG OSTÜ MEDENLOKA MEJEMBI

TAN HOPTA ATEMA - KOMA SÜLA ?

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?



April 22, 2021 nü South Dinajpur district nung West Bengal assembly election nüboyim sentong ka nung shilem agitsü atema West Bengal Chief Minister aser Trinamool Congress tongti lenir, Mamata Banerjee helicopter ka nung aruba noksa nung angur.

India nung ano nisung lakh 3.14 dak covid putet aser 2,104 asü

New Delhi, Rongchii/April 22 (Agencies): Brihostibarnü India nung ano nisung lakh 3 tema dak coroanvirus tashidak putetogo, aser ibaji linük ka nung anogo ka kija nung nisung timtiba dak iba tashidak putetba lir; tesüiba ghonda 24 tsüingda nungsa Indian nung coronavirus tashidak agi nisung 2,000 dak tema süogo.

Taküm January ita nung US nung ano ka kija nung nisung 297,430 dak coronavirus puteta liasü aser ibaji ajateta tang India nung anogo ka kija nung nisung

314,835 dak iba tashidak puteter.

Brihostibar anepdang Union health ministry indang data ajanga, tesüiba anogo ka tsüingda linük nung nisung 3,14,835 dak coronavirus putet aser nisung 2,104 asü; tang tashi nung linük nung coronavirus caseload 1,59,30,965 jungogo aser iba nungji tang teshirangdakpur 22,91,428 densema lir, ta metetdaksü.

Tang tashi nung nisung 1,34,54,880 anepogo aser iba

nungji tesüiba ghonda 24 tsüingda nisung 1,78,841 anepba densema lir.

Tang tashi nung linük nung iba tashidak agi nisung ajak agi 1,84,657 süogo aser nisung 13,23,30,644-i coronavirus vaccine agiogo, ta Health Ministry-i metetdaksü.

Indian Council of Medical Research (ICMR)-i ashiba agi, tanü tashi nung samples ajak agi 27,27,05,103 tendangogo aser iba nungji April 21 nü samples 16,51,711 tendangba densema lir.

Covid vaccination inyakyim kübok lanurtem sendoker: Sonia Gandhi

New Delhi, April 22 (Agencies): Congress Tir, Sonia Gandhi-i shidi ka ajanga Ato kilonser, Narendra Modi dang, coronavirus vaccination inyakyim ajanga state tem bendangshidanga züingshiba dang masü saka lanurtem khenyongi sendoker, ta metetdaksü. Centre sorkar dang iba inyakyim reprangshitsü mepishi.

Sonia-i shidi ajanga Ato kilonser dang, "Yaküm asenoki tansütsü lesson tulu angazükogo, ajisüaka sorkar maneni bendangshidanga inyaker," ta metetdaksü.

Congress tongti lenirisa, vaccination inyakyim ajanga India sorkari arrshi küm 18 nungi 45 tsüingdapur lanurtem khenyongi sendoker, ta metetdaksü.

Iba inyakyim ajanga sorkari lanurtem sendoker, ta shia lai,

"Iba inyakyim ajanga vaccine yanglurtem- Serum Institute of India (SII)-i vaccine jenjang balala lateter; Centre sorkar nem vaccine dose shia sen 150 agi agütsür, state sorkartem nem dose shia sen 400 agi agütsür aser nija hospital tem nem dose shi sen 600 agi agütsür," ta shidi nung shia lir.

Lai ashiba agi, vaccine agitsü atema sensotemi sen aika agütsütsüsa akümtsü aser ibaji ajanga state sorkartem senpong nungi sen jenti indoktsü.

Jenjang balala meshibaji tim masü, ta shia lai, "Company kati dang yangluba kasa vaccine nung kechiba jenjang balala asem meshir?" ta asüingdang.

Centre sorkar maneni aija lai, medical resources kanga ajemer, hospital tem nung yipten mangur, oxygen aser mozü peria mangur, süra kechiba ner sorkari nüburtem atema

mebilemtsüi inyaker?, ta asüingdang.

"Iba dak alia, tang ama timtem tulu aliba mapang nung kechiba India sorkari nüburtem timtemba nungi tajangzük angutsü arishir?" ta lai asüingdang.

"Centre sorkari vaccine lemzüktsüba nung bendangshidanga meinyaktsüla aser teladak süa inyaktsüla," ta lai ashi. Item onük nung ajemdaker lai Centre dang vaccine ji jenjang kasa agi agütsütsüla aser nisung ajak nem vaccine agütsütsüla, ta ashi.

Bodhbarnü Serum Institute of India (SII)-i state sorkartem dang Covishield vaccine dose shia sen 400 agi ayoktsü aser nija hospital dang dose shia sen 600 agi ayoktsü telemteba agiba sülen anogo ka lir Congress tongti leniri sorkar inyakyim ashishir.

Covid tensa kanga mejungaka Amit Shah-i maneni lokti senden agir

New Delhi, April 22 (Agencies): Bodhbarnü West Bengal nung nisung 10,784 dak coronavirus putet aser nisung 56 asü; state nung coronavirus tensa mejungi liaka Brihostibarnü Union Home Minister, Amit Shah-i election nüboyim lokti senden asem tashi ayongzüka agiogo.

Brihostibarnü state tesem balala nung nisung meyirjang aika adenshia nüboyim sentongtem nung dena liasü; kasa anogo nungsa election shilem trokbuba agidang nisung aika tarensena nokdaker vote agütsüogo.

Tang India kübok state aika nung coronavirus prokba nokdangtsü atema kanga kümdangba mapang nung West Bengal nungbo yimtenren party balalai nüburtem dang lokti tulu adenshia vote agüjang, ta ayongzüka liasü.

State nung election shilem ana dang agitsü anünga lir aser election shilem anaji April 26 aser April 29 anogotem nung agitsü.

Brihostibarnü Nadia, North 24-Parganas, Purba Bardhaman aser Uttar Dinajpur district tem nung menden 43 atema election agi aser nikongdang 4:00 ako tashi nung voters shilem 70.42 dak temai vote agütsüogo.

Coronavirus wara tamajungba akümba nung ajemdaker West Bengal Chief Minister, Mamata Banerjee-ibo Election Commission dang

tanüingba election shilem asempronglaji anogo ka nung dang agitsü mepishia liasü.

Tanüingba election shilem ana dak sendakba nung Union home minister, Amit Shah-i Dakshin Dinajpur, Malda aser West Burdwan district tem nung election nüboyim sentong agi.

BJP state unit Tir, Dilip Ghosh-ia tesem pezü nung road show agi, Delhi Lok Sabha MP, Manoj Tiwari-i Kolkata nung election nüboyim sentong asem agi, Bihar industry minister Syed Shahnawaz Hussain-i West Burdwan district nung election sentong ana agi, BJP lenir, Suwendu Adhikary-i Kolkata nung sentong asem agi aser taoba mapang Jharkhand chief minister Babulal Marandi-i West Burdwan district nung sentong asem agia liasü.

Tesüiba hopta ana tsüingda West Bengal election nung candidate anabo coronavirus tashidak agi süogo aser candidate 10 tema dak coronavirus putetogo.

Coronavirus puteta hospital balala nung amonger candidate temji- CPI(M) nungi Sujan Chakraborty, TMC nungi Ujjwal Biswas, Sadhan Pande, Madan Mitra, Kajal Sinha, Paresh Ram Das, Gholam Rabbani aser Kalpana Kisku nung, BJP nungi Rantidev Sengupta, Anandamay Barman, Samarendranath Ghosh aser Ambujaksha Mahanti Forward Bloc nungi Sanjib Chattopadhyay nung lir.



Patna, April 22, 2021: Brihostibarnü Patna nung coronavirus agi shiranger ka auto rickshaw ka nung hospital-i anir aruba noksa nung angur. Patna nung aliba hospital balala nung doctor aser paramedic staff 700 tema dak coronavirus putetogo.

Aluyimertemi longkak aitba tesem medoktsütsü: Rakesh Tikait

New Delhi, April 22 (Agencies): Brihostibarnü Bharatiya Kisan Union (BKU) lenir, Rakesh Tikait-i, aluyimba ozüing tasen asemprong magien tashi aluyimertem kidangi meyipa maotsü; longkak aitba tesemtem ya aluyimertem ki kümogo, ta metetdaksü.

Aluyimertem longkak aitba agi coronavirus prokshir ta aikati tai tongloktsüba dak sendakba nung tasüingdangba ka langzüdang Tikait-i, "Aluyimertem pei kidang (longkak aitba tesem) lir. Onoki parnok dang kechie oang ta ashitsü? Corona ya iba tesem nungi proker asü? Onok yangi tesüiba ita 5 tashi alir, aser iba ya onok ki," ta ashi.

Tikait-isa, aluyimer aikati Covid vaccine tanabuba aginer, ta ashi.

"Aluyimertem aikati mezüingbuba dose bo agiogo saka tanabuba dose aginüaka magiteter. Onoki ketdangsertem dang yangi vaccination camp amenokang ta mepishiogo," ta pai shisem.

Iftar nung aluyimertemi coronavirus tenokdangba alema benshiogo, ta aitsüba dak sendakba nung Tikait-i, "Iba mapang nungji aluyimertem kanga pilar amen. Sorkari nisung 50 tashi adenshitsü temelaba agüja lir. Parnok 22-35 shi dang liasü aser parnok shinga majurutep mesüra mesalem," ta ashi.



Jalandhar, April 22, 2021: Brihostibarnü Jalandhar nung aliba Shakti Oxygen Refill Plant nung hospital balala nung coronavirus tashidak agi shirangertem atema cylinders nung medical oxygen inokba noksa nung angur.



German sorkari coronavirus tashidak wara den raratsü sentong yangluba anema Berlin, Germany nung nüburtemi longkak aيتدang police temi longkak aiter ka ajunger aoba mapang tangokba noksa nung angur. Germany nung coronavirus tashidak den raraysü asoshi sorkar nem tashi tali agütsüsü atema parliament-i telemtetba agiogo.

Indonesia indang submarine ka samar bushir

Jakarta, Rongchii/April 22 (Agencies): Ketdangsür 53 aliba navy submarine ka nung oxygen magimadang kumzüksü asoshi Indonesia ket nung mapang ghonda 72 shi lir, ta tzüyim sepaitemi ashi. KRI Nanggala-402 submarine ya Bodhbarnep Bali tzükum nungi kilometer 100 shi pilar sama südi, ta ashir. Iba submarine bushiba maparen nung raradang amshiba rong trok, helicopter ka aser nisung 400-i shilem agir. Singapore aser Malaysia linüki par rong yokogo aser ano US, Australia, France aser Germany linüktemia yaritsü

shia lir. German nungeri yangluba submarine ya drill agia liasü saka osang magitepteti akum, ta tzüyim sepaitemi ashir. "Onoki iba tesem ya meteta lir saka kanga tarok lir," ta First Admiral Julius Widjojono-i osangbener dang ashi. Iba submarine ya tzü tarokleni alutsü melaba sülen osang magitepteti akum, ta osang kar ajanga ashir. Iba submarine tzü telungi aluba anasa totzü yimshia aliba ngutetba ya ajanga iba submarine totzü pongdang raksa südi, ta angateter, mesüra yangji alirtemi temaitsü kar sayuba alitsü, ta ashi.

Indonesia-i amshiba submarine pongu rongnung samar aliba ya dena lir. Iba submarine ya 1970s nung yanglua liasü aser South Korea nung küm ana tashi yanglushia 2012 küm renema liasü. Indonesia indang submarine samaba ibai mezüngbuba alitsü, ta tzüyim sepaitemi ashir. Saka taoba mapanga iba mesük tatalokba kar ajangshia aruogo. 2017 küm Argentina mitkar indang submarine ka nung nisung 44 mener southern Atlantic nung sama aser küm ka lir iba submarine teraksa ya nguteta liasü.

Syria indang missile ka Israel nuclear yangluba anasa tsük

Dimona, Rongchii/April 22 (Agencies): Syria indang anti-aircraft missile ka nukjidorong yur yokba nung mokongshi Dimona yimti nung aliba nuclear facility ka anasa apok, ta Israel army ajanga ashi, koba asaa inyakba masü südi, ta mitkar odongtar kati ashi. Kanga mimshia aliba Dimona nuclear reactor anasa iba lendong atalokba nung nisung yiruba mesüra ki-o-jen raksaba osangbo mali. Iba missile apokba ajanga nuclear site nung mokongshi, ta Israel mitkartemi ashi. Dimona anasa tsüka apokba Syria nunger missile ola ya kilometer 150 shi pilar Jerusalem nungia angashi, ta osangbener kati ashi. Syria nunger missile ya Israel indang tayimtsü ka nung khaloktsü saka alema oa Dimona tesem nung tsük, ta Israel mitkar indang odongtar kati ashi. Iba missile ya SA-5 lir, aser Israel air force tayimtsü tem nung khaloktsüba rongnung ka lir, ta odongtari ashi. Iba tatalokba nung telangzüba agüja Syria nung aliba missile batteries ishika makogo aser iba missile khaloktsüba tesem densema amak, ta Israel mitkartemi ashi. "Syria nungi surface-to-air missile ka Israel south tsütsü Negev nung khaloktsü. Iba telangzüba agüka onoki iba missile khaloktsüba tesem nung aser ano Syria nung surface-to-air batteries kar amak," ta Israel

mitkartemi ashi. Brehostibarnep Damascus nung tesem kar nung tenük yoker Israel-i amaktsü merangba Syrian air defences ajanga nokdangtet, ta Syria indang state news agency, SANA ajanga ashi. "Air defences ajanga rocket tem nokdangtet aser timba khazüka yok. Ajisüka sepaitemi yiru aser osettsüset kar raksatsü," ta SANA osang ajanga ashi. Israel indang missile temi Damascus northeast tsütsü kilometer 40 shi pilar Dmeir jila nung Syria sorkar indang air defence amenoka alidak amak, ta Britain nung amenoka aliba Syrian Observatory for Human Rights (SOHR) ajanga ashi. 2011 küm Syrian civil war tenzüka sülen Israel-i mapang shia Syria amaker, aser parnoki timba Iran aser Lebanese Hezbollah sepaitem aser sorkar meyong sepaitem dak tenük yoker amaker. Syria nung Iran-i teka amuoka shilem agitsü meranger, koba Israel-i maginer. Israel-i Tehran indang Natanz uranium enrichment plant nung timtem kar agütsüba ajanga Iran-i mang ayangtsü nangzüka linük ana tsüngta tensa mejungi aliba mapang missile ya khaloktsür. Ita tetenzüklen Natanz plant nung electricity agütsüba tesem nung tapoktsü tilaka agi kongshiba asoshi Iran-i Israel dak tai tonglojka liasü.

Navalny asünungbo Russia timtem ajurutsü: France

Paris, Rongchii/April 22 (Agencies): Chia-ajem mesür longkak aitsang Kremlin anemer Alexei Navalny asünungbo Tir Vladimir Putin aser Russia ketdangsür nem European Union ajanga tai tongloksütsü aser tenokdangba tasen agütsüsü, ta France foreign minister-i Russia dang Brehostibarnü ashi. Arishi küm 44 tain Navalny, shiba taoba küm nerve agent miim agi tepsettsü merang saka Russia ketdangsüri iba meinyak ta ashir, pa ya tepuokdak hopta asem tashi chiyongtsü machiba ajanga kanga kongra kumogo aser tashi mait lir, aser pa tembartemi pa ya tezüngjang aser temolungjang agi mapa meinyaki akumtsü, ta ashir. "Navalny nem tanen makai temerenshi agütsüba ya tizüktetla masü," ta Jean-Yves Le Drian-i France 2 television dang ashi. Navalny ya asünungbo Europe nung koda asütsü, ta asüngdangba mapang, "Asenoki nüngdakba tenokdangbatem agütsüsü aser ibaji Putin aser Russia ketdangsür khuret asütsü. Asenok talila maotsü ni amanger," ta Le Drian-i langzü. Moscow-i tawa eastern Ukraine arrtsü nung sepaitemi meyririjang aika yokba indang jembiba mapang, iba tebilemstü ya tang atemabo tenokdangba agi masü saka sensaksem agi angateteptisüla, ta Le Drian-i ashi.

"Pa (Putin) ya kidanger tamajung lir... khen-khen bo lendong keta lir, saka pa tang tashi lir asünung asenoki maneni jembishinütsü nüngdaker," ta Le Drian-i ashi. "Ukraine anema mitkartemi mera agitsü Russia tejangraba mali ta nibo bilemer, saka arrtsü nung sepaitemi yagi lendong ajurur." Ukraine anüdoklen arrtsü aser Crimea nung Russia sepaitemi yokba atema Ukraine-i alima teyari bushir, koba Kyiv nungi 2014 küm rakzüka liasü. Alexei Navalny tepuokdak ayuba anema Russia nung nisung meyririjang aikati temelaba melie Bodhbarnü longkak aita liasü. Parnoki tepuokdak alisang Navalny temang timi anepaluang, ta takhangba agütsür, kong longkak aiter nisung 1,000 dak tema puogo, ta osangtem ajanga ashi. February ita tepuokdaka yoksang arishi küm 44 tain Navalny ya teperem anguba aser tetsüng pezüba asoshi temang anepalutsü akhanger. Moscow yimti nung tulutiba longkak aita liasü, saka danga yimti tulutem nunga longkak aita liasü. Aser item rongnung Far East nung St Petersburg, Vladivostok, Siberia nunga yimti kar nung aser Navalny pua aliba Vladimir yimti nunga longkak aita liasü. Aikati Bodhbarnü longkak



Tepuokdak yua alisang opposition lenir Alexei Navalny busema Moscow, Russia anüdoklen kilometer 6,100 pilar Khabarovsk jila nung longkak aittsü teimla nung Russia police tem renemshir nokdaka aliba noksa ka yangi angur.

aitba ya tulutiba asütsü ta imlar, saka Navalny tepuokdaka yoktsü lia longkak aitba tulutiba liasü. Yimti 29 nung nisung 14,000 dak tema longkak aitba nung shilem agia liasü, ta police-i ashir. Aser item rongnung Moscow nunga nisung 6,000 adenshia liasü. Hombarnü Navalny ya tepuokdak aliba mozüki kati anir ao, kong ketdangsürtemi pa temang temolung süa dang lir, ta ashi. Pa anogoshi doctor kati temang repranger aser vitamin agitsü molungogo, ta FSIN prison service ajanga ashi.

Saka Navalny indang doctor temibo pa temang tekeraba nung anepalu mesüra anogo ishika tsüngta asütsü, ta tekümdangtsü shiogo. Navalny ya pa temang anepalurtem den majurutepdaktsüba mechi March 31 nü nungi achi-ajem mesüi longkak ait tenzüka liasü. Tawa pa indang azü tendangba ajanga pa tezüngjang agi mapa meinyaki akumtsü aser mashi mapang temolungjang nung timtem adoktsü ta sayur, ta pa indang doctor temi ashi. Taoba küm August ita pa dak nerve agent miim mozü ka amshi aser tera agi dang takum

kumzü, ta anüolen linüktemi ashir. Pa Berlin nung aliba intensive care-i anir aoba sülen toxicologist temi miim ya Russia nungeri amshiba Novichok liasü, ta bushitet. Iba lendong asoshi anüolen linüktemi Russia aitsü aser Navalny-i indang indanga Tir Vladimir Putin dak tai tongloksü. Ajisüka Kremlin-i kecha nunga shilem agia mali, ta nokdaker. Ashikilak mapa inyakba ken o ka nung aija 2014 küm tepuokdaka yokba nung aibelenba mechi Navalny ya February ita tepuokdaka yoka liasü.

Mokokchung nung IHCI training agiogo



April 19 nungi tenzüka anogo asem nü India Hypertension Control Initiative (IHCI) indang training ka yangi IDSP Conference Hall, CMO, Mokokchung nung akadang tangokba noksa nung angur.

Dimapur, Rongchii/April 22, 2021 (TYO): IDSP Conference Hall, CMO, Mokokchung nung April 19 nungi 21, 2021 - anogo asem tashi India Hypertension Control Initiative (IHCI) nung training ayonga agiogo.

National Programme for Prevention and Control of Cancer, Diabetes, Cardiovascular Diseases and Stroke (NPCDCS) kübok India Hypertension Control Initiative (IHCI)-i Hypertension atema screening programme jenjang tajungba achaayangtsür.

2025 tashi nung Non-Communicable Disease (NCD) ajanga meimchir asüba shilem 25% agi ajemdaktsütsü mechi India Sorkar indang mapatong tsütsü inyakyimtem kara odaktsütsü nükjidong yur iba project tenzüker.

Iba training nung shisalen sayurji Dr. Mohamed Jainul Azarudeen, Consultant (Medical), NIE (ICMR), Chennai aser Dr. Shubhabrata Das, Consultant (Medical) ICMR, Northeast Region IHCI na liasü.

District aser health care

facility nung drug logistic system tem akangshia aser manemer ka timtem angadanga anepalutsü tim shitak amshia Hypertension anepalubaren dak sendakba nung Health care workers temi tajungtiba achaayangtsütsü tesayuba balala agütsütsü atema iba training ayongzük.

Iba training nungsa Hypertension control programme bendeloka agiogo, kong Mokokchung District kübok Health Care facility tulu tila ajak nungi Doctor, Nurse aser Pharmacist temi iba training nung shilem agia liasü.

'National Medical Journal of India' nung "Prevalence of risk Factors for Noncommunicable diseases in a Rural Tribal Population of Mokokchung, Nagaland, India" nungja agütsür adokba study ka nung, awareness level (60 - 90 %) aika liaka, noncommunicable diseases atema lendongbang balala aliba sayuogo. Iba den külemi, nübur shilem 43% dak Hypertension timtem aliba shia lir, koba National average dang nungi temaba alitsü.

"Deaths due to Noncommunicable Diseases

among the Tribal Population in India: Mokokchung, Nagaland" study tanga ka nung, Circulatory system, (IHD & Cerebro vascular) ajanga asür timba (37%) aser asür rongnung stroke agi shilem 23% tashi asüba sayuogo.

Alima nung High blood pressure tashidak agi asür aika lir. Ajisüaka, India nung Hypertension agi kangshir nisung shilem 11% agi dang iba (HBP) ya azüokteta lir. IHCI kübok, high blood pressure alirtem mobile app ka nung register asütsü aser Hypertension passport (treatment card) agütsütsü.

Hypertension atema mozü asem agüja anepalutsü aser State Sorkar ajanga Kohima aser Mokokchung district kübok Sorkar facility nung mozü asempronlga angati agütsütsü.

India Hypertension Control Initiative (IHCI) Project ya Indian Medical Council of Medical Research (ICMR), World Health Organization (WHO) aser Ministry of Health & Family Welfare (MoH&FW), Government of India den State Sorkar longjemer inyakba mapatong ka lir.

Iba project amenoktsü atema, National Institute of Epidemiology (ICMR), Chennai ya Nodal agency alitsü.

Maneni, Mokokchung district nung India Hypertension Control Initiative (IHCI) project ya Hombarnü (19.04.2021) Chief Medical Officer, Mokokchung-i lapktsüogo aser State Sorkar nungi anti Hypertension drugs indang mezüing consignment atadar. Iba sülen, Hypertension alir atema item mozü agütsü tenzüksü.

India nung Realme 8 5G smartphone saya

New Delhi, Rongchii/April 22, 2021 (Agencies): Realme- i parnok indang Realme 8 series nung smartphone tasen ka bendenlokba sangdongogo. Iba smartphone ya Realme 8 5G asütsü aser device ya India nung sayaogo.

Tang shishilembadak, Realme 8 series nung 4G aketba Realme 8 Pro aser Realme 8 den Realme 8 5G angutsü.

Realme 8 5G tereprangtsü 4G variant ama alitsü saka camera aser processor tsütsü temelenshi kar angutsü. Iba 5G phone nung MediaTek G95 SoC melen octa-core Dimensity 700 5G processor inoka yanglutsüogo.

Iba smartphone tesülen triple camera setup ka angutsü, kong 48-megapixel shooter dena lir aser device ya Supersonic Blue aser Supersonic Black nung angutsü. Kasa mapang, Realme-isa Realme 8 Pro indang Illuminating Yellow sentsü ka sayaogo. Iba sentsü ya tang teyokdak aliba Pro model den kasa alitsü aser sen 17,999 asütsü.

Specification tsütsü reprangdangra, Realme 8 5G nung 6.5-inch full-HD+ (1,080x2,400 pixels) display den 20:9 aspect ratio aser 90Hz refresh rate inokja lir. Realme 8 4G indang 6.4-inch full-HD+ display dangbo 5G variant indang screen tuluba alitsü. Iba display panel yagi 600 nits peak brightness support asür aser tekümüzsütsü atema Dragontrail Glass agi meyibangja lir.

Realme 8 5G maparen MediaTek Dimensity 700 chipset den ARM Mali-G57 MC2 GPU aser 8GB LPDDR4x RAM ajanga achaayangtsür. Iba den külemi 128GB UFS 2.1 storage angutsü, koba microSD card ka ajanga 1TB tashi atsülanga amshitetsü. Phone yagi dual-SIM card support asür aser Android 11-based Realme UI 2.0 out-of-the-box inoka yanglutsüogo.

Phone tesülen triple camera system ya rectangular module ka nung inokja lir. Iba camera setup nung 48-megapixel

primary camera den f/1.8 aperture, 2-megapixel monochrome camera den f/2.4 aperture aser 2-megapixel shooter angutsü. Selfie aser video calling atema, iba smartphone tejaklen 16-megapixel camera inoktsüogo. Front aser primary rear camera anaprongla yagi Full-HD video recording support asür.

Tanga feature tsütsü reprangdangra, Realme 8 5G nung 5G, 4G LTE, Wi-Fi 802.11ac, Bluetooth v5.1 aser security atema side-mounted fingerprint sensor ka angutsü. Realme 8 5G nung battery tasazük 5,000mAh alitsü koba ajanga 18W Quick Charge fast charging support asür.

India nung Realme 8 5G - 4GB RAM + 128GB storage variant jenjang sen 14,999 aser top-end - 8GB RAM + 128GB storage option jenjang sen 16,999 alitsü. April 28, 2021 nü nungi tenzüka iba smartphone Flipkart aser official Realme channel tem ajanga ayoktsü terenemba lir.

KIBONG KÜMER KÜM 78 AJUNGBA TEPELA SANGDONGER




23rd April 1943 - 23rd April 2021

Obala **Sakulepden Lkr** (104 years) aser Ojala **Sennükmila Jamitsür** (101 years) (Akhoya) tena kibong kümer tanü küm 78 abensar, Tsüngrem taochi nung tanü tashi anema lia arishi talang moatsü nung Tsüngrem tenüing asanger. Tsüngremi ano ozü tsürabur anema aliba den arishi talang maneni moajang ta sarasademer.

Temeim, Chirnur, Anükapang, Semchir semnur aser Kinungertem

MENUNGRA BILEMTETER



Late **Sashiyanger Ozukum**
ASÜBA ANOGO : 23.04.2020

Teti dang meima aliba jabaso asür Sashiyanger, tanü na sür küm ka jungaka ne temeim, tepela jakden aser ne mapa tajungtem onok kodanga mamateter aser onok den na teti ali ama bilemteter.

Temeim Oja, Kinungtsü, Jala ana, Adianu aser Kinungertem.

MULUNGNEN O



Asoba:
14/05/1956

Asüba:
18/04/2021

Onoki teti meima aliba ojala asür **Mangyanglepla Longkumtsür** (Merangkong), shirangba mapang nungi asüba anogo tashi ozü shisabulu aser mangyim jashi nung alidang, kija, kibong, adianu, kiyonger, arogo, yimten aser lokti kwikati nübu, rongsen aser tamang sarasadem agi yariogo, nenok ajak dang pelaba lemsateper.

Nenok ajak dangi tsüngdong arua pelaba meshitetakasa asen teyanglur Tsüngremi nenok mapa tajung asoshi talubosa moajang ta onok sarasadem.

Temeim Kinungtsü, Chirnur, Semchirtem aser Kinungertem.

ALIAYOKER

Old Showuba area near Four Lane
1. Per Sq.ft. Rs. 90/- 2. Per Sq.ft. Rs.150/-
9856603713 / 9362576107



Agartala, Rongchii/April 22, 2021 : Brehostibarnü, 'Earth Day' anogomung nung Agartala kübok jana bendenba tesem nung jana shidenertem mapa inyakba noksa nung angur.

Tokyo Olympics: Torch relay nung adener ka dak Covid-19 putet

Tokyo, Rongchii/April 22, 2021 (Agencies): Taoba hopta Olympic torch relay sentong dak sendakba nung, police ka nem mapa nungloksüba sülen anogo ka lir pa dak Covid-19 positive putet, ta Brehostibarnü Tokyo Olympics ayongertemi ashi.

March 25, 2021 nü nungi northeastern Fukushima tesem nung iba torch relay sentong takok ngua tenzüker külen nungi tang relay nung adener dak mezüing iba tashidak puteter alitsü.

Asayamung ayongertemi ashiba agi, southwestern Kagawa prefecture kübok April 17 nü leg' nung traffic azüoktsü asoshi arishi küm 30 tain police nem mapa nungloksüba liasü.

Ketdangsur (Police) dak iba tashidak temaitsü agi shirangba sayu aser tasüingnü pa dak Covid-19 positive putet. Iba dak sendakba nung local health b a n g d a k p u r t e m i bushisüingdangdar, ta parnoki

ashi. Kagawa prefecture nung iba torch relay agiba mapang police ya tejak nembangba mask inoker social-distancing aser Covid-19 dak sendakba tekümdangtsü meratem nung anidaka liasü, ta ketdangsurtemi ashi.

Osaka meküta western metropolitan tesemtem aser Tokyo nung 'state of emergency' tasembuba sangoktsütsü asoshi Japan renema aliba mapang ka nung, relay nung adener police ka dak iba tashidak putetba osang angazüker.

Japan nung 'state of emergency' tasembuba ya Hokolbarnü sangdongtsü imlar.

Mongolbarnü, Japan nung Covid-19 puteter nisung 541,496 tashi kümogo aser iba wara mekokteti asür nisung 9,710 tashi tuogo. Lockdown akang akanga maliba ajanga, Japan nung nüburtemi tekümdangtsü meratem nung anidaktüsü asoshi

kangarabo khuret magir.

Tokyo Olympics ayongertemi ashiba agi, iba Games nung shilem agitsüpur athlete aser ketdangsur temi tajungtiba nung tekümdangtsü meratem agidar aser ibaji ajanga aruya aliba torch relay leg sentong nung tenokdangba madoktsü teimla lir.

Tang Japan nung tagidak aliba torch relay nung runner' 10,000 agi ita pezü tashi Japan tesem balala ayimjema asemtsü sentong lir. Iba relay ya July 23, 2021 nü National Stadium nung tembangba den külemi Olympics tenzüoktsü renema lir.

Maneni, tekümdangtsü meratem agitsü atema, taoba hopta leg tem Osaka kübok nübur senzüsönongba lenmang tem melena City Park nung shilem agirtem asemogo. Kasa yimya nung anidaka Okinawa indang Anüolen tip tzümezüti nung May 1 aser 2, 2021 nü leg kar achayangtsü imlar.

WTA Stuttgart 2021: Ashleigh Barty quarter-i iogo

Stuttgart, Rongchii/April 22, 2021 (Agencies): Bodhbarnü, WTA Stuttgart tetsür kija asayamung round tanabuba nung World no. 1 Ashleigh Barty-i takok ngua quarterfinal tongtetogo.

Iba asaya nung top seed Barty-i 6-0, 7-5 agi Germany tsür Laura Siegemund tsükdaktsü. Barty-i mezüing set minute 24 nung akok.

"Court tasen ka nung jangratema asaya liasü, taoba mapang asayaba court (clay-court) dang nungi iba court tajungba aser ni aginüba ama lir," ta aces trok angula Barty-i ashi.

Charleston sülen, WTA Stuttgart ya Barty indang tanabuba clay-court asayamung lir. Taruba ita French Open atema renemshitsü tebilemba nung lai iba asayamung nung shilem agir alitsü.

2019 küm Barty-i French Open title koka lir.

Taoba küm alima ajanga asüingba coronavirus wara ajanga arishi küm 24 tain Australia tsür Barty-i Roland

Garros nung shilem magi aser Poland tsür Iga Swiatek-i iba asayamung takok marok angu.

Hokolbarnü, quarter-final nung Barty-i taoba mapang world no. 1 Czech Republic tsür Karolina Pliskova den asayatsü.

Round tanabuba asaya tanga ka nung, World No.6 seed Karolina Pliskova-i Jelena Ostapenko madak 6-7(7), 6-4, 6-3 agi takok anguba sülen, la quarter final tonggogo.

Karolina-i iba asaya akoktsü atema aces 21 angu aser taküm lai tanaben Porsche Tennis Grand Prix (WTA Stuttgart) indang quarter final tongteter alitsü.

Pliskova-i iba asaya 7-5, 3-6, 6-3 agi makokdang Germany tsür Tamara Korpatsch-i set tanabuba nung la tsükdaktsüba sülen, lai tasembuba set nung kanga toktepa asayatsüsa aküm.

"Quarter final tongtetba atema pelar, saka taruba round nung yimya kar melenshia asayatsüla," ta world no. 9 Pliskova-i ashi.

"Iba asaya nung bilemba metongteti tera timtema liasü. Ni

aisü nung aibelenba asaya ama ni bilem, saka serve junga yokteta asayaago. Teti nunga mezüing round ji arendaka asayar aser tang ama clay court nung mezüing asayatsü ya tasak. Taruba round nung tanü dang nungi tajungba asayatsü teimla lir," ta Pliskova-i ashi.

Kasa asayamung asaya tanga ka nung, asemben Grand Slam takok angula Angelique Kerber-i Georgia tsür Ekaterine Gorgodze madak 6-2, 6-2 agi kokogo.

"Iba clay-court season nung junga asaya tenzüker ama bilemer. La (Ekaterina) ya asayar tajung ka aser kanga toktepa asayaago," ta Kerber-i ashi.

Tanabuba round asaya tanga ka nung, Estonia tsür Anett Kontaveit-i 7-5, 6-4 agi seed tasembuba America tsür Sofia Kenin tsükdaktsü.

Quarter-final nung, Kontaveit-i seed pungobuba Belarus tsür Aryna Sabalenka mesüra Germany tsür - qualifier Anna-Lena Friedsam den asayatsü.

Renemba ama World Test Championship final asayatsü: ICC

New Delhi, Rongchii/April 22, 2021 (Agencies): Alima tesem balala nung Covid-19 tensa mejungi küma aoyongjia, renemba ama World Test Championship final asaya ayongzüoktsü, ta International Cricket Council sangdong ajanga metetdaktüsü.

Ibuba World Test Championship indang final ya Ageas Bowl, Southampton nung June 18 nungi 22, 2021 tashi India aser New Zealand tsüingda asayatsü.

India nung alima ajanga asüingba Covid-19 wara tanaben adokba asadangteta, Hombarnü, United Kingdom

linük indang travel 'red list' nung India bendenlok, kong India nungi UK tashi nübur senzüsönongtsü nokdangar.

Ajisüaka, renemba ama iba Championship final asayatsü ICC dak teimla lir.

"Red list' asalentong ajanga kongshiba linüktem dak sendakba nung onoki UK Sorkar den jembishinüdar," ta ICC otongdar kati ashi.

"Tang ama tensa tamajungdang, tekümdangtsü mera tapet agia international cricket ayongzüoktsü asoshi ECB aser tanga züngsemtemi tasa/tebilemba balala lemsatepogo aser taoba

mapang nungi renema ataba ama taküm June ita UK nung World Test Championship Final asayatetsü onok dak teimla lir," ta kasa sangdong ajanga metetdaktüsü.

Taküm küm tetenzüklen, otsü asütsüsa India-i Australia madak 2-1 agi Test series akokba ajanga Championship final nung asayatsü lenmang sadema lapok. Iba sülen, India nung Virat Kohli'er teloki 3-1 agi England tsükdakja final nung asayatsü India team temsüa aküm. Iba den külemi, Virat Kohli-a senior national team den mezüing ICC trophy akoktsü asoshi maongka angur.

Governor's Cup: Amit Panghal semi final-i iogo

New Delhi, Rongchii/April 22, 2021 (Agencies): St. Petersburg kübok asaya aliba Governor's Cup boxing asayamung nung Olympic atema quota ngur alisang aser world silver-medal angur, Amit Panghal (52kg)-i pa nem lemzüoktsüba asaya koka Semi-final tongtetba sülen, pai bronze medal angutsü teimla lir.

Ajisüaka, kasa asayamung mezüing round nung külem India nung boxer pungo tashi tamakok ngur sülen iba Cup nungi tukadokogo.

Haryana nungi boxer Amit, shiba Asian Games champion takok bena lir, pai iba asayamung semi final tongtettsü atema Russia nung Tamir Galanov madak 5-0 agi takok angu. Ajisüaka, Sumit Sangwan (81kg), Mohammed Hussamuddin (57kg), Naman Tanwar (91kg),

Olympic atema quota ngur alisang Ashish Kumar (75kg) aser Vinod Tanwar (49kg) nungeri takok mengutetba ajanga asayamung nungi tsükogo.

49 kg category tetoktepa nung Vinod-i 2-3 agi Russia nung Igor Tsaregorodtsev makok. 81kg nung Sumit-a 0-5 agi Uzbekistan nung Dishod Ruzmetov makok.

Commonwealth Games bronze medal angusang Naman, shiba 91 kg nung toktepa liasü, Kazakhstan nung Aybek Oralbay-i 5-0 agi pa tsükdaktsü.

Ano külen, 75kg category tetoktepa nung Ashish-i 2-3 agi Russia nung Nikita Kuzmin makok.

57kg category nung Uzbekistan nung Miraziz Murzakhaliyov-i unanimous verdict' ajanga Hussamuddin kokogo.

Eoin Morgan dang senchi sen lakh 12 achi



Mumbai, Rongchii/April 20, 2021 (Agencies): Bodhbarnü, Wankhede Stadium kübok Kolkata Knight Riders (KKR) aser Chennai Super Kings (CSK) na asayaba mapang, T20 asaya nung lateta aliba mapang dang nungi timba agiba ajanga KKR captain captain Eoin Morgan dang senchi sen lakh 12 achi.

Kolkata Knight Riders puri run 18 agi iba asaya makok. Indian Premier League indang Code of Conduct kübok asaya atema mapang atakzüka aliba dak sendakba nung tan season KKR pur mezüing aibelener alitsü.

"Bodhbarnü (21.04.2021) Wankhede Stadium, Mumbai nung Chennai Super Kings den Indian Premier League (IPL) 2021 asayadang, atakzüka aliba mapang dang nungi talila agia KKR team-i asayaba sülen Kolkata Knight Riders captain Eoin Morgan dang senchi achi," ta IPL sangdong ka ajanga metetdaktüsü.

"Tan season, IPL indang Code of Conduct kübok atakzüka aliba mapang dang nungi mapang talila agia par (Eoin) team indang mezüing aibelen asünung, pa dang senchi sen lakh 12 achi," ta kasa sangdong nung shia lir.

Indian Premier League temzüing nung renema aliba ama, atakzüka aliba mapang dang nungi talila agia asaya mezüing aibelenba atema ozüing alema inyakba team indang captain dang senchi sen 12 agir. Iba season nung kasa yimya amshia tanaben aibelenra, team indang captain atema senchi sen mezüing dang nungi anasü agi timba (sen lakh 24) agitsü. Kasa mapang, aibelenba team nungi asayar 11 dang match fee shilem 25 mesüra sen lakh 6 (koba tajemba sudir) agitsü.

Season ka nung tasembenbuba atema aibelenra, aibelenba team indang captain dang senchi sen lakh 30 achitsü aser pa (captain) asaya ka nung nokdangtsü. Kasa mapang aibelenba team indang asayar 11 dang senchi sen lakh 12 mesüra match fee shilem 50 (koba tajemba sudir) meshitsü.

Tang asaya aliba Indian Premier League indang asaya 15buba nung, CSK-i over 20 nung run 220 yanglu aser wicket 3 out asü. Iba asaya tanabuba innings nung KKR pur run 202 dang yanglu asayar ajak out süadok.

Iba asayamung nung Chennai Super Kings puri asaya asem akoker alitsü aser point table nung parnoki temaba jenjang tongteta lir.

BILEMDANGANG

"Jangrabangra inyakba ajak shitak inyaker ama meblemetsüla."